

Na osnovu člana 13. stav 2. Zakona o slatkovodnom ribarstvu („Službene novine Federacije BiH“, broj 64/04) federalni ministar poljoprivrede, vodoprivrede i šumarstva, d o n o s i

P R A V I L N I K

o obliku, sadržaju i načinu vođenja ribarskog katastra

Član 1.

Ovim pravilnikom se propisuje oblik, sadržaj i način vođenja ribarskog katastra za ribolovno područje, odnosno ribolovne zone, način prikupljanja i dostavljanja podataka od značaja za unaprjeđenje i zaštitu ribljeg fonda, a koji se evidentiraju, te korištenje podataka iz katastra.

Član 2.

Cilj donošenja ovoga pravilnika jeste obezbjeđenje vođenja evidencija o površini i kvalitetu ribolovnih voda i njihovog okoliša i stvaranja optimalnih uslova za uzgoj i očuvanje ribljeg fonda u ribolovnim vodama, te o drugim podacima od značaja za unaprjeđenje i zaštitu ribljeg fonda

Član 3.

Katastar vodi i ustanovljava kantonalno ministarstvo nadležno za poslove poljoprivrede (u daljem tekstu: kantonalno ministarstvo) na osnovu podataka prikupljenih neposredno na terenu od organizacija koje koriste riblji fond na ribolovnom području, odnosno zoni.

Podaci iz ribarskog katastra su osnov izrade i realizacije ribarsko-privrednih osnova i drugih godišnjih i srednjoročnih planova korištenja i gazdovanja ribljim fondovima i kao pomoć korisnicima u gospodarenju ribljim fondom.

Član 4.

Katastar se vodi odvojeno za svako ribolovno područje, odnosno zonu ribolovnog područja.

Član 5.

U ribarskom katastru se evidentiraju sljedeći podaci o:

1. površini ukupnih ribolovnih voda ribolovnog područja ili zone, kao i posebnih revira na njima;
2. kvalitetu ribolovnih voda ili njenih dijelova;
3. branama, preprekama i drugim napravama u vodi putem kojih se upotrebljavaju ribolovne vode za proizvodne namjene;
4. mogućnostima optimalnog uzgoja ribe;
5. korisnicima ribolovnih voda (sportsko-ribolovnim organizacijama, drugim privrednim subjektima ili pojedincima ili dijelova tih voda);
6. ribarsko-privrednim programima i planovima i njihovom ispunjavanju;
7. štetnim pojavama na ribolovnim vodama ili njihovim dijelovima;
8. ribolovnim revirima, privremenim zabranama i plodištima kao trajnim zabranama;
9. drugim pokazateljima koji su određeni zakonom ili su na zakonom zasnovanim aktima ili su potrebni za ostvarivanje ribarskog katastra.

Član 6.

Ribarski katastar se ustanovljava i vodi u obliku kartoteke za svako ribolovno područje, odnosno zonu, a po obrascima koji su sastavni dio ovog pravilnika.

Sastavni dio kartoteke su hidrografske karte u mjerilu 1: 50.000.

Kartoteka se sastoji iz dvije osnovne liste (obrasca) koje su objavljene u ovom pravilniku i čine njegov sastavni dio na formatu A3 (297 x 420 mm) na dvije strane.

Član 7.

Putem obrasca „Opći podaci“ prate se promjene katastra ribolovnog područja, odnosno zone i sadrži posebne tabele za sljedeće stavke:

1. naziv ribolovnog područja, odnosno zone;
2. naziv kantona, grada ili opštine na čijoj se teritoriji prostire ribolovnog područje, odnosno zonu;
3. naziv organa koji je ustanovio ribolovno područje, odnosno zonu;
4. broj i datum akta o ustanovljenju ribolovnog područja, odnosno zone;
5. broj i datum akta o predaji ribolovnog područja, odnosno zone na korištenje određenom korisniku;
6. naziv organizacije koja gazduje ribolovnim područjem, odnosno zonom;
7. ukupna površina ribolovnog područja, odnosno zone u hektarima;
8. od ukupne površine:
 - a) ribolovno područje/zona iznosi ha;
 - b) površina ostatka vode koje se ne koriste za ribolov ha.
9. karakteristike ribolovnog područja, odnosno zone i okoliša (kratak opis)
 - šume;
 - šikare;
 - golet i krš;
 - močvare;
 - mrjestilišta i ribogojilišta;
 - ostale vodene površine.
10. nadmorska visina ribolovnog područja, odnosno zone od do m.
11. tip i karakteristike ribolovnog područja, odnosno zone:
 - podaci o vodi--- dijelovi voda;
 - ribolovni reviri, plodilišta, privremene ili stalne zabrane vršenja ribolova;
 - ribolovni okoliš;
 - dužina vodenog toka u km;
 - poprečna širina vodenog toka u m;
 - korisna vodena površina u ha;
 - značaj voda;
 - vrste riba koje su u vodama naseljene;
 - način iskorištavanja.
12. Uzroci i način nastanka šteta za riblji fond, kao što su: zagađivanje voda, mehaničko zagađivanje putem iskopa građevinskog materijala iz korita neregulisane i ne prečišćene kanalizacijske otpadne vode urbanih naselja, velike količine tvrdih otpadnih materijala u vodi, razna pregrađivanja tekućica, otpaci drvne industrije i pilana, smetljišta, ispusti motornog ulja i pranje automobila u koritima manjih tokova i td.
13. Uzroci i način nastanka šteta za riblji fond:
 - ljetni i zimski protok vode (vodostaj);
 - proljetno-ljetna naseljenost faune;

- prosječna naseljenost riba po vrstama i komadima i kg po jednom hektaru;
- prosječan prirodni prirast;
- prosječni vještački prirast po vrstama i o investitorima;
- prosječan godišnji izlov riba po vrstama;
- stanje ribarsko-čuvarske službe;
- podaci o stvarnim i potencijalnim zagađivačima ribolovnih voda (spisak i lokacije).

14. Ostali podaci

Član 8.

Putem obrasca „Praćenje promjena katastarsko ribolovnog područja, odnosno zone“ prate se promjene u pogledu unaprjeđenja ribarstva i zaštite ribljeg fonda u ribolovnim vodama ribolovnog područja, odnosno zone na osnovu izvršenih ulaganja i na osnovu programskih i planskih ribarsko-privrednih akata.

To se naročito odnosi na sljedeće:

- početno stanje ribljeg fonda na početku godine;
- ostvareni izlov po vrstama, broju komada i uzrastu;
- odnos izvršenog izlova sa količinama, vrstama i uzrastu planiranog za tekuću godinu;
- ostvareni prirodni prirast po vrstama riba i vodotoku;
- ostvareni vještački prirast po vrstama riba, količini i veličini ubačene riblje mlađi ukupno i na pojedinim vodotocima;
- uticaj zagađivanja voda otrovnim materijalima uništenjem ili oštećenjem ribljeg fonda uslijed određenih havarija, hidrografskih zahvata, pražnjenja vodenih akumulacija i sl. na stanje ribljeg fonda;
- pojava ribljih bolesti im preduzete mjere njihove zdravstvene zaštite;
- preduzete mjere zaštite riba od krivolovaca i drugih štetočina;
- utrošena finansijska sredstva za unaprjeđenje i zaštitu ribljeg fonda u tekućoj godini;
- prikaz ljetnog i zimskog vodostaja na pojedinim vodotocima tokom tekuće godine;
- broj korisnika dnevnih i periodičnih ribolovnih dozvola sa prikazom ukupnog godišnjeg broja izlazaka pojedinih ribolovaca;
- objekti na ribolovnom području, mrjestilišta, ribogojilišta, riblje farme, posebna plodišta i sl.
- ostali podaci

Član 9.

Za ribarstvo nadležna opštinska (gradska) služba za upravu i ribolovne organizacije i drugi subjekti dužni su dostavljati nadležnom državnom organu koji vodi ribarski katastar, podatke iz člana 5. i 7. ovog pravilnika kao upravni organi u oblasti ribarstva, odnosno kao ovlašteni korisnici ribljeg fonda.

Organ koji vodi ribarski katastar može zahtijevati i druge podatke koji su neophodni za vođenje katastra.

Korisnici ribljeg fonda dužni su u roku od deset dana izvijestiti organ koji vodi ribarski katastar o veličini šteta nastalih za riblji fond.

Podaci po obrascu „Praćenje promjena katastarsko-ribarskog područja/zone“ dostavljaju se svake godine do 30. marta za proteklu godinu od strane korisnika ribljeg fonda kantonalnom ministarstvu nadležnom za oblast poljoprivrede i Federalnom ministarstvu poljoprivrede, vodoprivrede i šumarstva.

Član 10.

Ribarski katastar je dostupan javnosti i svako ima pravo uvida u isti.

Član 11.

Ovaj pravilnik stupa na snagu osmog dana od dana objavljivanja u «Službenim novinama Federacije BiH».

Broj: 01-02- 329 /05
Sarajevo, oktobar 2005.godine

MINISTAR

Marinko Božić, dipl. ing. agr

RIBARSKI KATASTAR ZA RIBOLOVNO PODRUČJE

OPŠTI PODACI

Rbr.	Naziv	
1.	Ribolovno područje/zona	
2.	Kanton, grad ili opština na čijoj se teritoriji prostire ribolovno područje/ zona	
3.	Organ koji je ustanovio ribolovno područje/zonu	
4.	Ostvareni prirodni prirast po vrstama riba i vodotoku	
5.	Ostvareni vještački prirast po vrstama riba, količini i veličini ubačene riblje mlađi ukupno i na pojedinim vodotocima	
6.	Organizacija koja gazduje ribolovnim područjem/zonom	
7.	Ukupna površina ribolovnog područja/ zone u hektarima	
8.	Ukupna površina:	
	a) ribolovno područje/zona iznosi ha	
	b) površina ostatka vode koje se ne koriste za ribolov ha	
9.	Karakteristike ribolovnog područja, odnosno zone i okoliša (kratak opis)	
	a) šume	
	b) šikare	
	c) golet i krš	
	d) močvare	
	e) mrjestilišta	
	f) ribogojilišta	
	g) ostale vodene površine	
10.	Nadmorska visina ribolovnog područja, odnosno zone od do m.	
11.	Tip i karakteristike ribolovnog područja, odnosno zone:	
	a) podaci o vodi--- dijelovi voda	
	b) ribolovni reviri, plodilišta, privremene ili stalne zabrane vršenja ribolova	

	c) ribolovni okoliš;	
	d) dužina vodenog toka u km	
	e) poprečna širina vodenog toka u m	
	f) korisna vodena površina u ha	
	g) značaj voda	
	h) vrste riba koje su u vodama naseljene	
	i) način iskorištavanja	
12.	Uzroci i način nastanka šteta za riblji fond	
13.	Ostali podaci	

M.P. Ovlašteno lice: _____

**PRAĆENJE PROMJENA KATASTARSKOG
RIBOLOVNOG PODRUČJA/ZONE**

Rbr.	Naziv	
1.	Početno stanje ribljeg fonda	
2.	Ostvareni izlov po vrstama, broju komada i uzrastu	
3.	Odnos izvršenog izlova sa količinama, vrstama i uzrastu planiranog za tekuću godinu	
4.	Ostvareni prirodni prirast po vrstama riba i vodotoku	
5.	Ostvareni vještački prirast po vrstama riba, količini i veličini ubačene riblje mlađi ukupno i na pojedinim vodotocima	
6.	Uticaj zagađivanja voda otrovnim materijalima uništenjem ili oštećenjem ribljeg fonda uslijed određenih havarija...	
7.	Pojava ribljih bolesti i preduzete mjere njihove zdravstvene zaštite	
8.	Preduzete mjere zaštite riba od krivolovaca i drugih štetočina	
9.	Utrošena finansijska sredstva za unaprjeđenje i zaštitu ribljeg fonda u tekućoj godini	
10.	Prikaz ljetnog i zimskog vodostaja na pojedinim vodotocima tokom tekuće godine	
11.	Broj korisnika dnevnih i periodičnih ribolovnih dozvola i prikaz ukupnog godišnjeg broja izlazaka pojedinih ribolovaca	
12.	Objekti na ribolovnom području, mrjestilišta, ribogojilišta, riblje farme, posebna plodišta itd...	
13.	Ostali podaci	

M.P. Ovlašteno lice: _____